

BÌSITA FISCALE ORÀRIOS E RÈGULAS

UNA GHIA PRO TRABALLADORES PÙBLICOS E PRIVADOS DERETOS E DOVERES DE CHIE TRABALLAT

Custa est una ghia pro chie traballat e nde cheret ischire de prus

ITE EST SA BÌSITA FISCALE

In s'istatutu de sos Traballadores b'est iscritu chi, in su traballu, sos meres nche podent mandare sa bìsita fiscale pro averiguare si su traballadore istat male a beru e pro averiguare si est in domo o nono.

Sa bìsita fiscale est unu controllu mèdicu detzisu dae s'INPS o dae su datore de traballu pro averiguare s'istadu de salute de sos dipendenti chi non sunt andados a traballare ca ant tentu problemas de salute.

Pro mancare dae su traballu sa persone devet tènnere una malattia chi dd'impedit de traballare; custa malattia podet èssere atzertada cun una bìsita fiscale mandada dae su datore de traballu o dae s'INPS.



Su dotore incarrigadu devet, duncas, andare a domo de su dipendente (a s'indiritzu inditadu in su tzertificadu) in sos oràrios istabilidos. In antis de totu devet kontrollare si est in domo e, a pustis, devet kontrollare si est malàidu a beru e ite tenet. Una borta

fatu su controllu, su dotore lassat unu tzertificadu, in tres còpias; duas cherent dadas a sa ASL, una abarrat a su dipendente.

BÌSITAS FISCALES: ORÀRIOS

Sos oràrios e sas règulas pro sas bìsitas fiscales càmbiant si chie treballat est unu dipendente pùblicu, privadu, militare o maistru.

DIPENDENTES PÙBICOS

Sos dipendentes istatales, de s'Amministrazione Pùblica, maistros, militares, dipendentes de ASL o Entes Locales tenent s'òbligu de reperibilidade 7 dies a sa chida, finas sas dies chi non treballant, su fine chida, sa dies de festa e sas dies in antis de cussas de festa, in custos oràrios:

- Dae sas 9.00 a sas 13.00
- Dae sas 15.00 a sas 18.00

In custos oràrios su treballadore devet èssere in domo, a s'indiritzu inditadu in su tzertificadu de maladia, pro sa bìsita fiscale domandada dae s'INPS o dae su datore de traballu.

Non tenet s'òbligu de reperibilidade chie:



- Tenet maladias graves e tenet bisonzu de terapias sarvavida;
- At tentu dannu in su traballu;
- Tenet una maladia e dd'est istada reconnota sa càusa de servìtziu;
- Tenet problemas ligados a s'invalididade chi dd'est istada reconnota;
- Est prinza, no istat bene e non podet traballare.

TRABALLADORES PRIVADOS

Chie treballat in su setore privadu devet èssere reperibile totu sa chida intrea, finas sas dies de festa e sas dies chi non devet traballare, in custos oràrios:

- dae sas deghe de manzanu a mesudie
- dae sas chimbe a sas sete de sero



Finas chie treballat in su setore privadu est obligadu a si fàghere agatare a s'indiritzu inditadu in su tzertificadu de maladia pro sa bìsita fiscale domandada dae s'INPS o dae su datore de traballu; sas categorias *l'altra cultura* chi non sunt obligadas sunt sas

matessi de sos traballadores istatales.

ISTRUZIONE PÙBLICA - ORÀRIU BÌSITAS FISCALES E RÈGULAS

Chie traballat in s'Istruzione Pùblica - Miur - est obligadu a respetare s'oràriu de reperibilidade cando est in maladia. Sos oràrios e sos casos de esclusiones de sas bìsitas fiscales sunt inditados in s'art.17 de su CCNL 2007, mudadu dae su decretu ministeriale n.206 de su 18.12.2009 de su Ministru de s'Amministrazione pùblica chi at istabilidu custos oràrios:

- Dae sas noe a sa una
- Dae sas tres a sas ses de sero

Custos oràrios sunt bàlidos totu sa chida, finas su sàbadu e sa domìniga, sas dies de festa e cussas in antis de sas dies de festa.

In su matessi decretu bi sunt finas sos casos de esclusiones pro maistros e personale ATA; Non sunt obligados a sa reperibilidade si:

- mancant pro maladias graves chi rechedent terapias sarvavida;
- ant tentu dannu in su traballu;
- tenent una maladia e ddis est istada reconnota sa càusa de servìtziu;
- tenent problemas ligados a s'invalididade reconnota.

SANIDADE PÙBLICA E INFERMIERIS - ORÀRIOS BÌSITAS FISCALES

Sos oràrios de reperibilidade pro sos pro infermieris ASL e de su Sistema Sanitàriu Natzionale chi sunt in maladia, sunt inditados in su DL 78 de su 1 de trìulas 2009 e in su Decretu de su Presidente de su Cussizu de sos Ministros su 18.12.2009 18/12/2009 n.206 chi at istabilidu sos oràrios de reperibilidade pro sos dipendenti pùblicos in casu de ausèntzia pro maladia (GU n.15 de su 20/01/2010).

Sos infermieris si devent fàghere agatare in domo:

- Dae sas noe a sa una
- Dae sas tres a sas ses de sero.

Tenent òbligu de reperibilidade finas in sas dies de festa e in sas dies chi non devent traballare. Chie tenet maladias particulares non devet respetare s'òbligu de reperibilidade.

METALMECÀNICOS E CUMMÈRTZIU – REPERIBILIDADE IN MALADIA

Sas bìsitas fiscales e sos oràrios de bìsita pro sos metalmecànicos artigianos e indùstria, sunt istabilidos in su CCNL.

Sos oràrios sunt:

- dae sas deghe a mesudie
- dae sas chimbe a sas sete de sero.

Tenet deretu de costoire su postu de traballu pro unu tantu de tempus, tzerriadu perìodu de “comporto” e a tènnere un’indennidade de maladia INPS.

Pro chie traballat in su cummèrtziu, sos oràrios sunt sos matessi de sos metalmecànicos (dae sas deghe a mesudie e dae sas chimbe a sas sete de sero) onni die, finas su sàbadu e sa domìniga.

In casu de maladia in su cuntratu cummèrtziu, su traballadore ddu devet nàrrere immediatu a su datore de traballu e nche devet mandare su tzertificadu mèdicu online a s’INPS, mancari devat mancare pro una die ebbia. Cando unu traballadore cun su cuntratu de cummèrtziu est in maladia, tenet deretu de costoire su postu de traballu ma non devet mancare pro prus de 180 dies in un annu. Si mancat de prus, nche podet pèrdere su traballu.

BÌSITAS FISCALES: RÈGULAS

Su dotore incarrigadu de fàghere sa bìsita fiscale devet averiguare s’istadu de salute de su traballadore e cantu est istadu iscritu in su tzertificadu de maladia. Podet:

- allonghiare sa prògnosi de 48 oras;
- cunfirmare sa prògnosi;
- cambiare sa prògnosi si sa persone istat bene e non tenet s’istadu perunu; in custu casu ddi narat de torrare a traballare;
- ordinare una bìsita ispetzialìstica si tenet dudas subra sa diàgnosi o pensat chi sa persone potzat tènnere àteras maladias; su dipendente est obligadu a dda fàghere.

Si su traballadore non si faghet agatare a s’indiritzu iscritu in su tzertificadu de maladia dd’arribat una lìtera ufiziale pro andare a sa ASL in sa die e oràriu detzisu dae su dotore fiscale, pro zustificare su fatu chi non fiat in domo.

Si NON tenet una resone sèria, su traballadore:

- nche perdet s’indennidade de maladia pro sas primas deghe dies;
- pro s’àteru tempus de sa maladia leat sa metade ebbia de s’indennidade. Non contant sas dies chi fiat in s’ispidale o sas dies zai averiguadas cun una bìsita fiscale fata in antis.

Si non nche leat sa zustificatzione intro de 15 dies, s’amministratzione nde ddi podet leare s’istipèndiu, e si ddu faghet a ischire.

Sa resone de s'ausèntzia podet èssere:

- **zustificada**, cheret nàrrere chi sa persone at tentu un'istrubu sèriu chi non podiat trantzire o fàghere in àteru oràriu;
- **non zustificadu**, cheret nàrrere chi sa persone no est istada abbista (no at intèndidu cando ant pichiadu a sa ghenna e duncas sa bìsita non s'est pòdida fàghere).

INPS: BÌSITAS FISCALES PRUS FISCALES

Cun sa tzirculare n.9/2013 chi pertocat su protzessu de programmazione e s'ispeza pro su 2013 s'INPS at domandadu:

- de reduire de su 5% s'ispeza pro sas bìsitas fiscales;
- de aumentare de su 3% su dinari, cuberadu gràtzias a su nùmeru prus bassu de prògnosis fatas.

In su 2013 sos tzertificados de maladia sunt istados 5,33 millones, de traballadores siat pùblicos chi privados; 207.000 de prus de su 2012 e, a parte de s'INPS, tocat a fàghere a manera chi siant meda prus pagu. Custa detzisione no est agradada meda a sos dotores, e no a issos ebbia.

S'òrdine de sos dotores de Milanu at respostu narende chi su dotore, cando faghet una prògnosi, non sighit resonamentos de dinari ca "*sas maladias non nche podent èssere postas in sos custos comente chi esserent tinta pro istampantes*".

Su sindacadu de sos dotores, Fimmg, at finas nadu chi sa bìsita fiscale serbit pro averiguare si chie est malàidiu podet traballare o nono, non pro controllare su cumportamentu de sos dotores de famiglia.

Comente funtzionant sas bìsitas fiscales?

Novidades 2014 2015

Sa novidade prus manna pro sas bìsitas fiscales est cussa de sos tzertificados *online*.

S'INPS, gràtzias a su sistema telemàticu, at fatu unu muntone de cambiamenti pro cantu atenet a sas bìsitas fiscales, chi interessant siat sos dipendentes pùblicos chi privados: oe sunt prus lestras meda.

In antis, difatis, dae cando beniat decrarada sa maladia de su traballadore a sa possibile protzedura de rechesta de bìsita dae parte de s'azienda, bi passaiat finas una die intrea. Como benit fata deretu e duncas belle semper sas bìsitas fiscales Inps si faghent sa matessi die chi incumentzat sa maladia decrarada, siat dae dipendentes pùblicos chi privados. Abarrant semper cussos sos oràrios istabilidos pro leze pro sa reperibilità de sos traballadores.

Semper gràtzias a su mèdiu telemàticu, totus sos dipendentes

pùblicos e privados podent bìdere in cale si siat momentu sos atestados/tzertificados issoro in su situ de s'INPS e podent domandare in cale si siat momentu chi s'INPS ddis mandet sos tzertificados a sa casella de posta eletrònica tzertificada, PEC.

Suspensione controllos mèdicos fiscales INPS: est de su 8 de cabudanni de su 2014 s'ùrtima novidade chi tratat de bìsitas fiscales: s'INPS at segadu de su 90% sas bìsitas mèdicas pro controllare sa salute de sos traballadores de su setore privadu. Custu diat chèrrere nàrrere prus pagu dinari pro sos dotores de s'INPS, chi benint pagados pro su nùmeru de bìsitas fiscales chi faghent a sa die; ma diat chèrrere nàrrere finas prus pagu controllu de sos dependent privados chi no andant a traballare pro maladia chi, a custu puntu, podent finas no respetare prus sos oràrios de reperibilidade. Pro custa resone sos dotores INPS preguntant a su Governu de uniformare su setore de sas bìsitas fiscale e de ddis permitere de fàghere sos controllos paris cun sa ASL in su setore pùblicu.

Cantu costant sas bìsitas a su datore de traballu e a s'Amministrazione pùblica?

Sas bìsitas fiscales pro controllare sos dependentes chi mancant pro maladia, tenent custos diferentes chi càmbiant si sa bìsita de sos dotores ASL o INPS est fata intre chida, su sàbadu o sa domìniga o in dies de festa.

Su chi pagat su datore de traballu chi petit una bìsita est custu:

- a) bìsitas fiscales a domo, a intro de chida: € 41,67
- b) bìsita fiscale a domo, in die de festa: € 52,82
- c) visità fiscale in ambulatoriu, si su traballadore in s'oràriu de bìsita devet zustificare s'essida: € 28,50
- d) si sa bìsita non s'est pòdida fàghere ca sa persone no est istada agatada in domo: intre chida € 28,29, in die de festa € 39,61
- e) ispesas amministrativas € 4,73
- f) ispesa pro benzina: a intro de bidde/tzitade € 6,00, foras de bidde/tzitade finas a 20km € 10,00; prus de 20 km € 15,00.